

14.04.2016.



Povodom završetka radova na izgradnji zgrade Biznis centra u okviru projekta "Goražde-zona unaprijeđenog poslovanja" u ulici Sinan paše Sijerčića, koji je finansiran od strane Europske komisije, a implementira se zahvaljujući OXFAM-u i njegovim partnerima na ovom projektu - Općini Goražde, Vladi BPK, Obrtničkoj komori BPK i Razvojnoj agenciji Informest iz Italije, danas je organizovana svečanost kako bi se ozvaničio završetak prvog dijela projekta u okviru kojeg je izgrađena zgrada Biznis centra.

Na početku svečanosti riječi dobrodošlice u ime domaćina uputio je načelnik Općine Goražde dr.sci. Muhamed Ramović – "Poštovani predstavnici delegacije Europske unije, predstavnici OXFAM-a i ostalih domaćih i stranih vladinih i nevladinih organizacija, poštovani predstavnici zakonodavne i izvršne vlasti, dragi sugrađani. Ovaj dan ostaće upamćen kao jedan od najznačajnijih trenutaka za razvoj preduzetništva i preduzetničkog duha na prostorima Istočne Bosne i Hercegovine. Ovaj projekat je od neizmjernog značaja za sve privrednike, članove udruženja i mlade ljudi koji imaju aspiracije da samostalnim radom i privređivanjem doprinesu razvoju naše zajednice i dodatno nas etabliraju kao centar regije koja je prepoznala potencijale biznisa i privrednog sektora, te proaktivno radi na unaprijeđenju svojih kapaciteta i pružanju podrške građanima u njihovim aktivnostima. Ovaj projekat ne bi bilo moguće implementirati bez naših partnera, Europske komisije, Vlade Bosansko-podrinjskog kantona, OXFAM-a, te naših vrijednih udruženja koja su prepoznala značaj projekta i aktivno učestvovala u svim njegovim fazama. Budući da je naše opredjeljenje jačanje infrastrukture u svim oblastima društvenog djelovanja, u potpunosti smo zadovoljni ključnom aktivnosti Projekta, a to je izgradnja ove prelijepe zgrade i njeno stavljanje u funkciju, kroz smještaj u istu udruženja koja pružaju usluge

poduzetnicima. Objekat već služi kao svojevrsni centar za pružanje široke lepeze usluga malim i srednjim poduzećima koja će dobiti veći broj i kvalitetnije usluge u skladu sa svojim potrebama, a poseban dio objekta će služiti kao Centar za obuku i Kuća zanata. Već smo svjedoci niza edukacija koje se ovdje odvijaju i dajemo punu podršku nastavku svih aktivnosti. Dragi prijatelji, ovo je prvi dio projekta i već smo napravili značajne i vidljive rezultate, a u nastavku ćemo urediti ostatak starog dijela grada čime ćemo zaokružiti jednu urbanu cjelinu i dovršiti ovaj izrazito značajni projekat. Svim akterima srdačno se zahvaljujem uz poruku da nas samo jedinstvo, sloga i rad na zajedničkim ciljevima i vrijednostima mogu učvrstiti na našoj poziciji regionalnog centra i vodeće lokalne zajednice kada su u pitanju reforme neophodne za europski put Bosne i Hercegovine."



Nakon obraćanja, presjecanjem vrpce, zgradu Biznis centra su zvanično otvorili načelnik Općine Goražde dr.sci. Muhamed Ramović, premijer BPK-a Emir Oković, predstavnik Delegacije EU u BiH Martin Schiender i direktor OXFAM-a u BiH Stefano Baldini.

U sklopu svečanosti uručeni su Sporazumi o uspostavi Biznis centra Općem udruženju "Stari zanati" obrtnici Općine Goražde, Udruženju poslodavaca BPK-a, Turističkoj zajednici BPK-a, Obrtničkoj komori BPK-a i Privrednoj komori BPK-a, a također su dodijeljene i zahvalnice Delegaciji EU u BiH, OXFAM-u i Vladi BPK-a za učešće i neizmjeran doprinos u implementaciji projekta "Goražde-zona unaprijeđenog poslovanja".

Prilikom obraćanja Martin Schiender, predstavnik Delegacije EU u BiH je istakao – "Otvaranje Biznis centra ovdje danas u Goraždu je veliki uspjeh svih lokalnih partnera. Novoosnovani poslovni centar ovdje u Goraždu će obezbijediti širok dijapazon usluga malim i srednjim preduzećima u svim aspektima, dakle, svim razvojnim akterima u cilju što boljeg funkcionisanja poslovnog centra obezbijediće na taj način 20 programa obuka, učestvovati i biti na sastancima, služiti kao okosnica turizma i promotivnih aktivnosti za nove biznise povezujući Goražde sa tehnološkim parkovima i svim centrima u BiH i šire. Nadamo se da će osnivanje ovog centra

pomoći da se poveća poslovna aktivnost koja je važna po pitanju Reformske agende."



U ime implementatora Projekta OXFAM-a prisutnima se obratio direktor OXFAM-a u BiH Stefano Baldini – "Smatramo da će ova zgrada biti od ključne važnosti, kako za dalje unaprijeđenje poslovne saradnje, također i dobra prilika za sve one koji možda nisu imali priliku, kao što su mladi, a posebno žene da kreiraju i smanje siromaštvo na taj način."

Da će funkcionisanje Biznis centra zavisi od načina korištenja kazao je premijer Vlade BPK-a Emir Oković – "Naravno da sada sve zavisi od nas od načina korištenja ovog prostora, njegovog raspolaganja i njegovim upravljanjem. Ja još jednom želim istaći da bih bio sretan i nastojat ćemo da projekat lokalnog partnerstva realizujemo kroz ovaj objekat, a suština čitave priče jeste da se svi akteri uključe u razvoj projekata i onoga što svi možemo ostvariti na ovom području."

O prednostima novoizgrađenog Biznis centra kroz smještaj udruženja koja pružaju usluge poduzetnicima istakao je Ahmed Popović član Obrtničke komore BPK-a – "Jedan objekat ovakvog tipa u našem Kantonu će nama donijeti jednostavno jednu drugačiju atmosferu poslovanja i okupljanja obrtnika, imaće jedan direktan cilj gdje će svaki obrtnik znati gdje se može obratiti za stručnu pomoć i za savjete. Sama saradnja sekretara komora i Udruženja poslodavaca na jednom mjestu dovešće do razvoja novih ideja, biznis planova i da ćemo jedni drugima biti oslonac u ovoj zgradi."

